

Vedlegg – Lokal forskrift om utslepp av sanitært avlaupsvatn frå bustadhus, fritidshus og liknande i Vinje kommune.

Paragrafane nedanfor er eit utdrag frå den lokale forskrifta. Det er desse krava som er relevante for løyvet me har informert om i dette brevet. Heile forskrifta finn de på [Lovdata](#).

§ 9. Utsleppskrav

Anlegg som slepper ut sanitært avløpsvatn skal oppfylle følgjande utsleppskonsentrasjonar:

Forureiningsparameter Høgaste utløpskonsentrasjon

Tot-P < 1,0 mg/l (tilsvarar ein reinseeffekt på > 90 %)

BOF₅ < 25 mg/l (tilsvarar en reinseeffekt på > 90 %)

Der særskilte brukarinteresser som til dømes fiske, bading og drikkevatn, kan bli berørt av tiltaket, kan kommunen stille krav til utslepp av bakteriar, TKB og/eller E.Coli.

I særskilte høve kan kommunen stille skjerpande krav.

Dersom det berre vert sleppt ut gråvatn, skal gråvatnet minimum gjennomgå reinsing med godkjente reinseløysningar som beskrive i § 8.

§ 10. Utsleppsstad

Utsleppsstad må leggjast slik at det ikkje kjem i konflikt med andre brukarinteresser, slik som uttak for drikkevatn eller rekreasjon.

Utsleppet bør, der det er mogleg, gå til naturleg infiltrasjon.

Alle overflateresipientar som mottak reinsa avløpsvatn skal ha sikker årsvassføring. Dette inneber vassføring som ved middeltemperatur over frysepunktet ikkje tørkar ut av naturlege årsaker oftare enn kvart tiande år i gjennomsnitt.

Utslepp til ferskvatn skal lokaliserast minst 2 meter under lågaste vasstand. Kommunen kan ved brukarinteresser sette strengare krav til lengde og djubde på utsleppsleidning.

§ 11. Godkjente reinseløysingar

Avhengig av stadlege forhold og anleggets føremål vil følgjande reinseløysningar kunne bli godkjent:

- a) Med klosett tilknytt (spillvatn):
 - Lukka infiltrasjonsanlegg.
 - Jordhauginfiltrasjonsanlegg.
 - Filterbedanlegg (konstruert våtmark).

- Minireinseanlegg kl. I (kjemisk og biologisk reinsing) eller kl. III (bare kjemisk reinsing).
- Tett tank er ikkje godkjent som reinseløysing i Vinje kommune.

b) Utan klosett tilknytt (gråvatn):

- Lukka infiltrasjonsanlegg.
- Jordhauginfiltrasjonsanlegg.
- Filterbedanlegg, konstruert våtmark.
- Prefabrikkerte gråvassanlegg.
- Sandfilteranlegg.

For minireinseanlegg kan kommunen eventuelt kreve etterpoleringstrinn.

§ 12. Krav til drift og vedlikehald

Slamavskiljarar skal tømast regelmessig i kommunal regi, jf. kommunens føresegn om renovasjon og slam. Minireinseanlegg skal tømast ein gong per år. Hyppigare tømning skal utførast av kommunal/godkjent renovatør og må kostast av anleggseigar. Ettersyn utførast i samband med vanleg årleg tøming. Avvik skal rapporterast til kommunen.

For alle andre avløpsanlegg enn slamavskiljarar/infiltrasjonsanlegg, krev kommunen skriftleg drifts- og vedlikehaldsavtale mellom anleggseier og firma med naudsynt kompetanse. Signert avtale skal sendast kommunen seinast saman med første årsrapport etter oppstart eller overtaking av anlegg. Dersom eit godkjent firma er konkurs, eller opphøyrer av annan årsak, pliktar anleggseigarar å inngå avtaler med anna godkjent firma.

Service og vedlikehald skal som eit minimum utførast med følgjande tidsintervall:

- Minireinseanlegg: I samsvar til krav fastsett av leverandør i serviceavtale.
- Filterbedanlegg: 1 gong per år for fritidsbustader, 2 gonger per år for bustader.
- Infiltrasjonsanlegg: I tilknytning til tøming: i samsvar med føresegn for avfall mv, Renovest IKS.
- Sandfilteranlegg: I tilknytning til tøming: i samsvar med føresegn for avfall mv, Renovest IKS.
- Prefabrikkert gråvassanlegg: 1 gong kvart 2. år.

Årsrapport for anlegg med service- og vedlikehaldsavtale skal sendast til kommunen innan 1. februar for det føregåande året. Den skal minimum innehalde følgjande:

- Kort beskriving av anlegget.

Omtale av driftsforhold førre år med spesiell vekt på eventuelle driftsproblem og handtering av avvik.

- Resultat av analyser.
- Vurderingar av naudsynte utbetringar, med dette utskifting av filtermedium.

§ 13. *Prøvetaking*

Prøvetaking, oppbevaring og konservering av avløpsprøver skal utførast i samsvar med dei til ein kvar tid normerte krav.

Alle prøver av utsleppsvatn skal analyserast av laboratorium som har godkjent fullmakt for dei aktuelle analysene. Det skal analyserast for parametrar ut frå gjeldande krav i § 6. Analysemetodar nemnt i forureiningsføresegna kapittel 11 skal nyttast.

All prøvetaking skal utførast av nøytral fagkyndig verksemd og kostast av anleggseigar.

§ 14. *Tilsyn og kontroll*

Kommunen, eller den kommunen gjev mynde til, har rett til å inspisere anlegg til ei kvar tid, og kan ta utløpsprøver for kontroll av at reinsekrav vert halde.